

*Factum du Procez pendant au Conseil,*

POVR l'Oeconome du Chapitre de l'Eglise Metropolitaine  
de Saint Sauueur d'Aix, intimé.

*CONTRE Maistre Honoré Audibert Prestre, Vicaire de Pellissane,  
Prieur du Prieuré ou Chapelle de Saint Martin de Sonnaillet,  
appellant.*

20. **L'**Appel sur lequel il s'agist de prononcer, a esté interjetté par ledit Audibert de la Sentence du Seneschal d'Aix, en date du 3. Novembre 1661. par laquelle en ladite qualité de Prieur ou Chapelain de Saint Martin de Sonnaillet, il a esté maintenu diffinitiuement dans la possession & iouyssance de perceuoir les dixmes dépendante dudit Prieuré, pour la separation de laquelle, il est dit que les Experts qui auoient esté desia commis, luy assigneroient la quantité de terres suffisantes pour porter annuellement la redevance de seize charges de seigle pour le droit de dixme, à raison du vuzain franchises de seruice, & du droit de cueillette, suivant & conformément au bail par luy produit du 12. Novembre 1557. outre les deux charges de bled auxquelles lesdites dixmes sont sujettes; & que lesdits Experts, pour assigner lesdites terres, commenceroient aux terres qui sont au dessous de la Chapelle dudit Saint Martin, tirant dans la plaine de Sonnaillet, & qu'ils planteroient des bornes en la maniere accoustumée.

Le Conseil peut connoistre par le seul dispositif de ladite Sentence, qu'elle est absolument aduantageuse audit Audibert; & neantmoins c'est luy qui s'en plaint aujourd'huy, & qui en a interjeté appel; il est maintenu dans des dixmes qui luy estoient contestées, l'on en ordonne la separation & la diuision, suivant & conformément à vne piece qu'il a luy-mesme produite; le Juge ordonne que la terre, sur laquelle on les assignera, sera voisine de la Chapelle dudit Prieuré; & cependant il tire tant d'auantage de ses chicannes ordinaires, qu'il veut encores se plaindre, quoy qu'en effet il gagne sa cause.

Le Conseil remarquera, s'il luy plaist, pour l'intelligence du fait, que le Chapitre de Saint Sauueur d'Aix, comme Prieur & Curé primitif d'Aurons, est decimateur general dans tout ce territoire.

Ledit Audibert pretend que le Prieuré ou Chapelle de Sonnaillet, dont il est pourueu, y possède quelque dixme.

Il est vray qu'en l'année 1659. elles luy furent contestées sur vn Canton, sur lequel il vouloit les leuer contre sa possession par Maistre Pierre Bourges,



Vicaire dudit Aurons : Cela donna lieu à vne contestation, laquelle ayant esté portée pardeuant le Seneschal d'Aix, & denoncée au Chapitre, qui est le decimateur, il fut ordonné par vne premiere Sentence du 29. Iuillet de ladite année, que ledit Audibert veriferoit sa possession en ladite dixme; & ledit Chapitre au contraire, dans vn temps qui luy fut limité, & cependant & par prouision, par vn preiugé qui marque la faueur du Iuge, il fut maintenu dans ladite dixme.

Quelque temps apres, & au mois de Septembre ensuiuant, ledit Audibert declara en Iustice qu'il se desistoit de cette preuue, & qu'il vouloit s'en tenir aux tiltres qu'il rapporteroit, & en mesmes temps il produisit quantité de pieces anciennes & modernes, qui iustifioient que les Prieurs & Chapelains de Sonnailet possedoient quelques dixmes dans la Parroisse d'Aurons; mais il estoit impossible de sçauoir quelle quantité, parce que c'estoit ou des baux, dans lesquels mesmes les tenans & aboutissans du territoire n'estoient compris, & des transactions où les dixmes estoient simplement énoncez.

Il se trouua seulement entre lesdites pieces vn bail du 12. Nouembre 1557. produit cote D,D, desdites dixmes, pour le prix de seize charges de seigle; & vn autre du 16. Avril 1566. cote E,E, où elles sont données pour seize sommées de bled : Ce sont ces deux pieces qui marquent le mieux la valeur de ladite dixme.

Le peu d'éclaircissement qui estoit dans lesdites pieces auroit donné lieu à vne seconde Sentence du 23. Fevrier 1660. par laquelle ledit Audibert auroit esté maintenu diffinitiuement dans la possession de ladite dixme qui appartenoit audit Prieuré; ledit Seneschal d'Aix ordonna, que la separation en seroit faite par les Experts, dont les parties conuiendroient, & qu'ils planteroient des bornes en la maniere accoustumée; & il auroit esté ordonné que pour raison de ce, Sapiteurs seroient pris, & témoins ouys, si besoin estoit, aux frais communs des parties.

Depuis ladite Sentence ayant esté executée, les Experts conuenus par les parties s'estant transportez sur les lieux, les témoins ayans esté entendus de part & d'autres, le Chapitre ayant fait vne enqueste, & mesme vne information de l'autorité du Commissaire, iustificatiue de la subornation que ledit Audibert auroit fait des témoins; le tout rapporté, & le procez prest à iuger, ledit Audibert pour tascher de mettre le procez hors d'estat, se feroit constitué demandeur en cassation de ladite enqueste; mais cette cassation estant mal fondée, le Seneschal d'Aix auroit trouué par le iugement du fonds tant d'ambarras dans les enquestes, & vne si grande varieté de faicts, que ne pouuant trouuer vn pied certain pour assigner lesdites dixmes, il l'auroit pris sur ladite piece cotee D,D, de la production dudit Audibert, qui estoit ledit bail fait desdites dixmes le 12. Nouembre 1557. moyennant la quantité de seize charges de seigle par chacun an; & par la derniere Sentence contradictoire



du 3. Novembre 1661. il auroit continué à maintenir ledit Audibert dans ladite dixme ; & pour la separation d'icelle , il auroit ordonné que les Experts commis luy assigneroient la quantité de terre necessaire pour porter annuellement pour le droit de dixme au vuzain , la quantité de seize charges de bled seigle, franchises de seruices, & droits de cueillette , comme il a esté cy-dessus expliqué.

Le Conseil voit qu'en cela le Seneschal a fait la justice toute entiere aux parties, il demeure constant au procez que ledit Prieur de Sonnailet possédoit des dixmes dans le territoire d'Aurons , mais il estoit incertain quelle quantité luy appartenoit ; il ne s'est trouué qu'une seule piece au procez , qui estoit le bail sur lequel on se pouuoit regler , parce qu'il portoit le veritable prix de ladite dixme en essence ; c'a esté le reglement du Seneschal Juge : peut-on dire qu'on ait fait en cela quelque tort audit Audibert ; & n'est-il pas visible que s'il a appellé de la Sentence, c'est vne vexation toute pure.

Le principal moyen sur lequel ledit Audibert appuye son appel , est que ledit Seneschal d'Aix n'a pû establir vn fondement certain pour faire la separation de ladite dixme sur ledit bail de 1557. & parce qu'il a vne possession de quarante années, qui luy donne vn droit de dixme beaucoup plus grand que celui qu'il possédoit lors, parce que tous les arrentemens estant augmenté depuis ce temps, il n'y a point de lieu de se servir d'un bail de 1557. pour détruire vn droit qu'on demande en 1660.

Ces deux raisons sur lesquelles roullent ses griefs, reçoient deux réponses fort faciles ; A l'égard de la premiere, pour y satisfaire, il est certain que ledit Audibert ne se peut pas servir de sa possession pour establir son droit en aucune maniere : *Primò*, parce qu'elle estoit fort incertaine, & que tout ce qu'il y a de témoins entendus, ne déposent pas de la quantité des dixmes que luy & ses predecesseurs auoient à prendre sur ledit territoire d'Aurons : En second lieu, il a si bien iugé que cette possession estoit inutile, qu'il y a renoncé luy-mesme en iustice : Il a esté remarqué cy-dessus, que d'abord il a mis en fait sa possession ; que la premiere Sentence du 29. Iuillet 1659. auoit ordonné qu'il en feroit preuve par témoins, & en la maniere ordinaire, mais depuis il l'a abandonnée ; Il a déclaré mesme, qu'il n'entendoit se servir que de la preuve par escrit resultante des pieces qu'il produisoit : Quel grief le Juge luy a-t-il fait, de ne se pas arrester à vne preuve incertaine, qui ne concludoit rien de precis, pour s'attacher à vne preuve literalle, laquelle il auoit demandée luy mesme, & qu'il a puisée dans ses pieces.

La deuxième raison est encores plus facile à détruire, & c'est vne equiuoque dont on se veut servir, qu'il est facile de decouurir : Il est bien vray que depuis cent années les baux ont augmenté de prix, & doublé mesme, mais ce sont les baux qui ont esté faits à prix d'argent ; par exemple, ce qui valoit cent liures en l'année 1557. pourroit bien aujourd'huy valoir deux cens liures ; mais cela n'est pas veritable en matiere de baux faits en espece : Ce qui pro-



duisoit il y a cent ans seize septiers ou charges de seigle, n'en produit pas davantage aujourd'huy ; la force de la terre qui ne dépend point du consentement des hommes, comme le prix des especes est demeuré le mesme depuis ce temps, elle n'a point changé ; & l'on ne peut pas dire à cet égard, que les arrentemens faits de cette maniere ayent augmenté en aucune façon ; la terre n'est pas deuenüe plus fertile, elle ne s'est point bonifiée, elle est demeurée au mesme estat ; ainsi quand on s'est appuyé sur vne piece de cette qualité, pour faire la separation de la dixme, on n'a point fait de tort audit Audibert ; elle rapportoit en l'année 1557. seize charges de bled seigle au Prieur de Saint Martin de Sonnailet, l'on fait en sorte aujourd'huy, par ladite Sentence, qu'elle luy en rapportera la mesme quantité ; il n'est point greué par cette separation, & l'on peut mesme dire que c'est vn expedient que ledit Seneschal a trouué, pour mettre toutes les parties hors d'interest, pour rendre à chacun ce qui luy appartient, & iuger la contestation avec certitude.

Ledit Audibert se sert encores d'un troisiéme moyen, qui est, qu'il pretend que depuis ce bail de l'année 1557. ledit territoire sur lequel ses dixmes estoient perceptibles, est deuenu bien meilleur par la quantité des deffrichemens qui y ont esté faits ; mais c'est vn faict aduancé en l'air, duquel il n'y a rien de prouué au procez, & il est impossible mesme qu'il le soit absolument, parce que quand les témoins auroient déposé qu'il y a eu depuis ce temps quelques deffrichemens dans ledit territoire d'Aurons, comme il n'est pas constant sur quel endroit dudit territoire ledit Prieur à ses dixmes, l'on ne pourroit pas iuger si ils ont esté faits ou dans son canton, ou dans le reste dudit territoire qui appartient audit Chapitre ; ce qui marque que ce moyen n'a pas beaucoup de fondement.

Ledit Audibert a encores expliqué quelques moyens dans son Inuentaie de production ; mais comme ils ne regardent que la procedure, & qu'ils ne touchent point du tout le faict de la contestation, le Conseil est supplié d'en voir la réponse qui y a esté faite dans les contredits de ladite production, ils sont tellement foibles, qu'ils ne meritent pas d'estre repettez.

Par toutes lesquelles raisons, ledit intimé espere que le Conseil luy fera la justice de debouter ledit appellant de son appel, avec condamnation de tous despens, dommages & interests.

*Monsieur BITAUD, Rapporteur.*